

ՄԻՋՆԱԴԱՐԱԳԻՏԱԿԱՆ

ՀԱՅ ՄԻՋՆԱԴԱՐԵԱՆ ՀԱՄԱԼՍԱՐԱՆՆԵՐԸ

Հայ ժողովրդի կրթութեան, մշակոյթի պատմութիւնը վկայում է, որ հնում, մասնաւորաբար, միջնադարում մենք ունեցել ենք բարձր տիպի զանազան դպրոցներ՝ վարդապետարաններ, վարժարաններ, ճեմարաններ, համալսարաններ, որոնք պատրաստել են եկեղեցական գործիչներ, մանկավարժներ, արուեստի ու գիտութեան մասնագէտներ: Միջնադարեան համալսարաններից շատերը աստիճանաբար վերածուել են կատարեալ համալսարանների, որով եւ հաստատապէս դրուել են հայկական բարձրագոյն կրթութեան հիմքերը¹:

Սոյն յօդուածի նպատակն է ամփոփ ներկայացնել եւ ըստ արժանւոյն գնահատել հայ միջնադարեան համալսարանների (Նարեկաւանքի վարդապետարան, Սիսի համալսարան, Նոր Գետիկի կամ Գոշավանքի համալսարան, Անիի վարդապետարան, Հաղպատի բարձրագոյն դպրոց, Տաթևի համալսարան, Գլաձորի համալսարան, Դրազարկի վարդապետարան) գործունէութիւնը: Այսպէս՝

Նարեկի (Նարեկավանքի) վարդապետարան

Վանայ լճի հարաւային ափերին տարածուած Ռշտունիք գաւառի Նարեկ գիւղում գործել է Նարեկի (Նարեկավանքի) վարդապետարանը: Որպէս հիմնադրման դար նշուում է X-ը, իսկ հիմնադիրն է համարւում նշանաւոր փիլիսոփայ ու մտածող Անանիա Նարեկացին, որն էլ դարձել է առաջին ուսուցչապետը: Նարեկի վարդապետարանը յիշատակւում է որպէս հայ գրչութեան եւ մանրանկարչութեան յայտնի կենդրոն (X-XI դարերի): Զարգացած էին երաժշտագիտութիւնն ու մեկնաբանական արուեստը: Անանիա Մոկացու մահուանից յետոյ (978 թ.) ուսուցչապետ է դարձել նրա արժանաւոր աշակերտ, աշխարհահռչակ Գրիգոր Նարեկացին (նրա հետ Նարեկավանքում ուսուցանել են նաեւ իր եղբայրները): Նարեկի վարդապետարանի յայտնի սաներից էր X դ. պատմիչ Ուխտանէսը, որն իր ուսուցիչ Անանիա Նարեկացու յանձնարարութեամբ գրել է «Հայոց պատմութիւն» երկը:

Սիսի համալսարան

Կիլիկիայի հայկական պետութեան մայրաքաղաքում յայտնի քաղաքական եւ հոգեւոր գործիչ Ներսէս Լամբրոնացին XII դարի վերջերին հիմնադրել է աշխարհիկ համալսարան, որտեղ կրթութիւն են ստացել ժամանակի հայ նշանաւոր գիտնականներ ու պետական գործիչներ: Այս համալսարանում գիտական գործունէութիւն են ծաւալել Մխիթար Գոշը, Կիրակոս Գանձակեցին: «Եօթ ազատ արուեստներից» բացի դասաւանդւել է պատմագրութիւն, ազգային եւ թարգմանական գրականութիւն, փիլիսոփայութիւն եւ այլն: Ուսումնառութեան իտէպլը աթենական կրթութիւն էր: Սա վկայում է այն մասին, որ Մայր Հայաստանում եւ Կիլիկեան Հայաստանում վերածնունդն աւելի վաղ է սկսուել:

¹ Յ. Սիմոնեան, Հայ մանկավարժութեան պատմութիւն, Երևան, 2012, էջ 59:

Նոր Գետիկի կամ Գոշավանքի համալսարան

Այս համալսարանը հիմնադրել է յայտնի առակագիր Մխիթար Գոշը XII դարի վերջին Նոր Գետիկի վանական համալիրում, որն յետագայում կոչուել է Գոշավանք։ Դասաւանդուել են հայոց եւ օտար լեզուներ (յունարէն, լատիներէն), քերականութիւն, փիլիսոփայութիւն, ճարտասանութիւն, երաժշտութիւն, գրչութեան արուեստ, նկարչութիւն։ Սաները ստանում էին գիտնականի՝ վարդապետի աստիճան։ Մեծ վերելք է ապրել XIII դարում։ Նոր Գետիկի կամ Գոշավանքի համալսարանում են ուսում ստացել հայ մշակոյթի ականաւոր գործիչներ Վանական Վարդապետը եւ Կիրակոս Գանձակեցին, ովքեր իրենց հիմնած դպրոցներում շարունակել են Գոշավանքի համալսարանի աւանդները։ Գանձակեցին Գոշի մասին գրել է. «Եւ նրա իմաստութեան համբաւը տարածուեց ամբողջ աշխարհում, եւ բազմաթիւ սովորողներ էին նրա մօտ ուսանում»։ Գոշավանքում ընդօրինակուել եւ ստեղծուել են բազմաթիւ ձեռագրեր, որոնք պահուել են վանքի գրատանը։

Անիի վարդապետարան

Անիի բարձրագոյն դպրոցը հիմնադրուել է XI դարում եւ գործել է մինչեւ XIII դարը։ Այն հայ մտաւորականութեան պատրաստման, գիտութեան ու արուեստի զարգացման կարեւորագոյն օջախ էր։ Բարձրագոյն դպրոցն աչքի էր ընկնում իր աշխարհիկ բնոյթով։ Դասաւանդուում էին արտաքին-իմաստասիրական, մաթեմատիկական, ճարտարապետա-կառուցողական, բժշկա-բնագիտական գիտութիւններ։ Տեւական ժամանակ դպրոցը ղեկաւարել են Գրիգոր Մագիստրոս Պահլաւունին (XI դարում), ապա՝ Հաղպատից հրաւիրուած Յովհաննէս Սարկաւագ Իմաստասէրը (XI դարի վերջից եւ XII դարասկզբում)։ Վերջինիս ռաբունապետութեան տարիներին վարդապետարանը ունեցել է բազմաթիւ շրջանաւարտներ։ Այս դպրոցի սաներից են եղել Սամուէլ Անեցին, Գրիգոր Փակակալը եւ ուրիշներ։

Հաղպատի բարձրագոյն դպրոց

Հաղպատի վանքի կառուցումից անմիջապէս յետոյ (976 թ.) նրա հիմնադիր եւ առաջին վանահայր, նշանաւոր գրիչ Սիմէոն վարդապետը հիմնեց Հաղպատի դպրոցը։ Այստեղ դասաւանդուում էին փիլիսոփայութիւն, քերականութիւն, հռետորութիւն, աստուածաբանութիւն եւ այլ գիտութիւններ։ Դպրոցի նշանաւոր ռաբունապետերից էին փիլիսոփայ, տոմարագէտ Յովհաննէս Իմաստասէրը, Սամուէլ Անեցին, Դաւիթ Քոբայրեցին, Մխիթար Քոբայրեցին եւ այլք։ Հաղպատի դպրոցում հիմնականում ծաղկեց գրչութեան արուեստը։ Այստեղ ընդօրինակուում եւ ստեղծուում էին հայ մանրանկարչութեան հոյակապ յուշարձաններ։ Յիշատակենք «Հաղպատի Աւետարանը», որը մանրանկարչական արուեստի լաւագոյն նմոյշներից է։ Հաղպատի բարձրագոյն դպրոցը գոյատեւեց մի քանի դար եւ սերունդներին պարգեւեց տասնեակից աւելի արժէքաւոր ձեռագրեր։

Դրազարկի վարդապետարան

Կիլիկեան Հայաստանի ամենահնագոյն ուսումնագիտական կեդրոնը՝ Դրազարկի (Թրազարկ) վարդապետարանը, հիմնել է Թորոս Ա. իշխանը (1100-1129) XII դ. սկզբին Տաւրոս լեռների ստորոտին՝ Սիս մայրաքաղաքի մօտակայքում գտնուող համանուն վանքում։ Դրազարկը հռչակուած էր նաեւ որպէս մանրանկարչութեան եւ ծաղկողական արուեստի կեդրոն, ունեցել է լեզուների բարձրորակ դասաւանդման համբաւ։

Վարդապետարանի սաներից էր յայտնի մանրանկարիչ Սարգիս Պիծակը: Մեծ համբավ ունէին Դրազարկի երաժշտագիտութեան ուսուցիչները: Նրանցից էին Դրազարկի ուսուցչապետներ Թորոս Երաժիշտը (Թորոս դասապետ) եւ Յովսէփ Երաժշտապետը: Այստեղ ընդօրինակուել են բազմաթիւ Երզարան մատեաններ՝ խազագրուած տաղերով: Դրազարկի վարդապետարանը յայտնի էր նաեւ որպէս լեզուների դասաւանդման կարեւորագոյն կեդրոն: Այստեղից են դուրս եկել Կիլիկեան պետութեան բազմաթիւ դիւանագէտներ: XIII դ. առաջին կէսին Դրազարկի ուսուցչապետն էր Հեթում Ա. (1226-1270) արքայի եղբայր Բարսեղը, որի իրաւասութեանն էին յանձնուած թագաւորութեան արտաքին յարաբերութիւնները: Վերոյիշեալ Թորոս դասապետը XIII դ. վերջին եղել է Հայոց դեսպան Անգլիայում: Դրազարկի հետ է կապուած միջնադարի խոշորագոյն առակագիր Վարդան Այգեկցու գործունէութիւնը:

Գլաձորի համալսարան

Միջնադարեան Հայաստանի նշանաւոր ուսումնագիտական կեդրոնը՝ Գլաձորի համալսարանը, որը դասուում է միջնադարեան Եւրոպայի համալսարանական հաստատութիւնների շարքին, հիմնադրուել է 1282 թուականին Ներսէս Մշեցու կողմից, գործել մինչեւ 1340-ական թթ.: Համալսարանը հովանաւորել են Պռոշեան եւ Օրբելեան իշխանական տները, ինչպէս նաեւ Սիւնիքի եկեղեցական իշխանութիւնը: Նրա բազմամեայ ղեկավարը (մինչեւ 1331-ը) եղել է Եսայի Նչեցին: Վերջինիս ռեկտորութեան տարիներին համալսարանը համարուում էր «Յիսուսական համալսարան», «Երկրորդ Աթենք» եւ որպէս գիտութեան ու մշակույթի կեդրոն՝ «Մայրաքաղաք ամենայն իմաստից»²: Գլաձորը «փայլեր որպէս զարեգակն ի վերայ աշխարհի... զի ազգս հայկազեան մեծ պարծանս ունէր զսա ի վերայ ամենայն ազգի»: Համալսարանն ունէր ներքին կանոնադրութիւն, ուսումնագիտական աստիճանաւորում, աւարտաճառերի պաշտպանութիւն: Իր բնոյթով ու թեքումով նմանուել է հասարակագիտական կամ արուեստից գիտութիւնների համալսարանի: Դասաւանդուել են աստուածաբանութիւն, դիցաբանութիւն, իմաստասիրութիւն, մատենագիտութիւն, քերականութիւն, ճարտասանութիւն, տրամաբանութիւն, թուաբանութիւն, աստղաբաշխութիւն-տոմարագիտութիւն, երկրաչափութիւն³: Ունեցել է երեք լսարան (մասնագիտացում)՝ ա. ուսումնարան ներքին եւ արտաքին գրոց, բ. գրչութեան արուեստի՝ մատենագիտութեան եւ մանրանկարչութեան, գ. խազագիտութեան եւ երաժշտութեան: Գլաձորի համալսարանում դասաւանդուել են շուրջ երկու տասնեակ ուսուցչապետներ եւ վարդապետներ, այդ թւում՝ Դաւիթ Սասնեցին, Գրիգոր, Մարտիրոս, Յովհաննէս, Կիրակոս ու Կիւրեղ րաբունապետները: Գլաձորի համալսարանում ստեղծագործել եւ որպէս ուսուցիչներ աշխատել են նշանաւոր մանրանկարիչներ Թորոս Տարօնացին, Աւագը եւ Մոմիկը: Ուսում ստանալու նպատակով այստեղ են ժամանել աշակերտներ Հայաստանի եւ Կիլիկիայի շատ վայրերից: Հայկական ուսումնամշակութային կեդրոնների համար Գլաձորի համալսարանը պատրաստել է 350 ուսուցիչ-վարդապետներ: Ուսման տեւողութիւնը եղել է 7-8 տարի՝ չհաշուած քահանայական կրթութեան տարիները: Շրջանաւարտները պարտադիր քննութիւն են յանձնել դասընթացներից: Շրջանաւարտներին վարդապետի աստիճանի շնորհումը տեղի էր ունենում հանդիսաւոր արարողութեամբ, հայցող թեկնածուները հանդես էին գալիս աւարտաճառերով: Նրանք ստացել են «վարդապետական հրաման» կամ «վար-

² Նոյն տեղում էջ 60:

³ Իւր. Անտիսեան, Հ. Զաքարեան, Հայոց լեզու, Երեւան, 2012, էջ 526:

դապետական գաւազան», որը նրանց իրաւունք է տուել «դասասաց» լինելու⁴: Գլաձորում են գրուել ու զարդարուել տասնեակ ձեռագիր մատենաներ, որոնցից մի քանիսը պահուում են Մաշտոցի անուան մատենադարանում, Վենետիկի Մխիթարեանների մատենադարանում, Երուսաղէմի Ս. Յակոբեանց վանքում, Լոնտոնի Բրիտանական թանգարանում եւ այլ վայրերի ձեռագրական հաւաքածոներում⁵:

Տաթևի համալսարան

Սիւնեաց բարձր տիպի դպրոցը որպէս համալսարան յիշատակուում է 1380-ական թուականների սկզբներից: Գլաձորի համալսարանի փակուելու պատճառով Յովհան Որոտնեցին տեղափոխուել է Որոտնավանք, հիմնել դպրոց, ապա հաստատուել Տաթևում եւ, վերակառուցելով Տաթևի կրթարան-վարդապետարանը, հիմք է դրել նոր, բարձր տիպի դպրոցի՝ համալսարանի: Նրա օրօք այն «անձուկ եւ խաւարեալ ժամանակիս փայլէր որպէս զարեգակն ի վերայ աշխարհի»: Գոյատեւել է մինչեւ 1435 թ.: Այնտեղ էին հաւաքուել ժամանակի գիտուն եւ բանիմաց շատ վարդապետներ, մօտ 500 հոգեւորականներ, փիլիսոփաներ, երաժիշտներ, գրողներ, նկարիչներ, ինչպէս նաեւ արւեստագէտներ ու արհեստաւորներ: Յետագայում միաբանների թիւը հասել է 1000-ի: Տաթևի համալսարանը հովանաւորել է Օրբելեան իշխանական տունը, ինչպէս նաեւ Սիւնիքի եկեղեցական իշխանութիւնը: Ունեցել է երեք լսարան (ուսումնարան)՝ ուսումնարան ներքին եւ արտաքին գրոց, գրչութեան արուեստի, երաժշտութեան: Առաջինում ուսումնասիրուել են փիլիսոփայութիւն, ճարտասանութիւն, քերականութիւն, բանաստեղծական արուեստ, մանկավարժութիւն, մայրենի լեզու, գրականութիւն, պատմութիւն եւ այլն, երկրորդում՝ գրչութեան արուեստ, գեղագրութիւն, գրքերի գեղարուեստական ձեւաւորում, մանրանկարչութիւն, երրորդում՝ հին երգ ու երաժշտութիւն, երաժշտութեան տեսութիւն⁶: 1386 թ. րաբունապետ է դարձել Գրիգոր Տաթևացին: Տաթևացին կատարելագործել է համալսարանի ծրագիրը, կազմել դասագրքեր («Գիրք հարցմանց», «Գիրք քարոզութեան...», «Գիրք որ կոչի Ոսկեփորիկ»): Առանձնակի ուշադրութեան է դարձուել փիլիսոփայութեանը: Համալսարանն ունեցել է կանոնադրութիւն, ուսումնագիտական աստիճանաւորում: Մշտապէս ունեցել է մեծ թուով սովորողներ (150-300 եւ ավելի), իսկ ուսման տեւողութիւնը 7-8 տարի էր՝ չհաշուած քահանայական կրթութեան տարիները: Սաներից են եղել Թովմա Մեծփեցին, Առաքել Սիւնեցին, Բարսեղ Բաղիշեցին, Մատթէոս Զուղայեցին, Սիմէոն Եղուարդցին եւ ուրիշներ: Տաթևի համալսարանն ունեցել է հարուստ մատենադարան, որը գոյատեւել է մինչեւ 1911-12-ը (մատենադարանի 140 ձեռագիր մատենաներ այժմ պահուում են Երեւանի Մատենադարանում)⁷:

Հայ միջնադարեան համալսարանների համակողմանի քննութիւնը մեծապէս կարող է նպաստել հայ մշակոյթի բազմաթիւ իրողութիւնների բացայայտմանը: Ժամանակի ոգու եւ պայմանների թելադրանքով մեր կրթական համակարգը որոշակի առաջադիմական մտայղացումներով է առաջնորդուել, ինչպէս՝ երբ Եւրոպական Միջնադարում մոլեգնում էր ինկվիզիցիան, երբ ճշգրիտ գիտութեան (բժշկութիւն, տիեզերագիտութիւն...) ներկայացուցիչները հալածուում, խարոյկի էին հանուում, երբ նոյնիսկ կենդանիների հերձման փորձերը չէին հանդուրժում, Հայաստանում ուսուցողական նկա-

⁴ Նոյն տեղում էջ 526:

⁵ Ա. Աբրահամեան, Գլաձորի համալսարանը, Երեւան, 1983, էջ 6:

⁶ Իւր. Աւետիսեան, Հ. Զաքարեան, Հայոց լեզու, Երեւան, 2012, էջ 527:

⁷ Քրիստոնեայ Հայաստան Հանրագիտարան. Երեւան, 2002, էջ 993:

տառումներով դիտարկմամբ ուսումնասիրում էին ներքին օրգանները (անատոմիայ, ֆիզիոլոգիայ...), դասախոսում էին կենսա-բնագիտական այնպիսի մտքեր, որոնց համար Եւրոպայում մի քանի անգամ խարոյկի կը հանէին, Կիլիկեան բժշկանոցներում թոյլատրում էր յանցագործների վրայ փորձարկումներ անել (որպէս արդարացում մէկի տառապանքը շատերի բուժման միջոց կարող է դառնալ) եւ այլն⁸։ Առայսօր հայ միջնադարեան համալսարանների ուսումնասիրումը արդիական է. կարող են երեւան գալ քօղարկուած փաստեր, վարկածներ։ Վերջերս անդրադարձ է կատարուել հայագիտութեան մէջ առայժմ չուծուած մի հարցի՝ Գլաձորի համալսարանի տեղորոշմանը։ Համալսարանի գտնուելու վայրի մասին պահպանուած բազմաթիւ վկայութիւնների, պատմական փաստերի, աղբիւրագիտական նիւթերի, կատարուած դիտարկումների հիման վրայ ներկայացուել է մի նոր վարկած⁹։

Այսպիսով, հայ մշակոյթի, կրթութեան, գիտութեան զարգացման ասպարէզում հսկայական նշանակութիւն են ունեցել միջնադարեան համալսարանները։ Վերոնշեալ նիւթը փաստում է, որ հայը բոլոր ժամանակներում է գիտակցել բարձրագոյն կրթութեան տեղն ու դերը, արժեւորել համակարգուած գիտելիքների ու գործնական հմտութիւնների նշանակութիւնը։

ՎԱՆՏԵՐ ՊԷՐՊԷՐԵԱՆ

ԵՊՀ ասպիրանտ, ՀՀ ԿԳՄՄՆ «ԿԶՆԱԿ» մասնագէտ



⁸ Յ. Սիմոնեան, Հայ մանկավարժութեան պատմութիւն, Երեւան, 2012, էջ 64։

⁹ Առաւել մանրամասն տե՛ս Տ. Մկրտչեան, Գլաձորի համալսարանի տեղորոշման նոր վարկած, Երեւան, 2016։